

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होर भारत दे सभ्भनं शा लम्मे कार्यकाल आहले चुने गेदे प्रधानमंत्री बनी गेन। दुनिया दे केंई नेताएं इस मौके उनें गी ममारकबाद दिती ऐ ते भारत दे तेजिया कन्ने विकास दे नजरिये लेई उन्दी सराहना कीती ऐ।
2. केन्द्र च NDA सरकार दे 12 बरे पूरे होने ते प्रधानमंत्री हुंदे सभ्भनं शा लम्मे अरसे तगर लगातार चुने गेदे प्रधानमंत्री बने रोहने दे सिलसिले च अज्ज NDA दी इक बैठक नमीं दिल्ली च लगगा रदी ऐ।
3. ग्रामीण विकास लेई केन्द्र सरकार नै सवा लक्ख करोड़ रपे दी महत्वपूर्ण योजनाएं दी घोषणा कीती ऐ- G-RAM-G अधिनियम लागू होने कोला पैहले गै राज्यें ते केन्द्र शासित प्रदेशें गी 95 जहार करोड़ रपे कोला मती रकम जारी करी दिती गेदी ऐ।
4. ओमान ते समुन्द्री कंडे कश अमरीकी फौज दे इक अपाचे हेलीकाप्टर गी नशाना बनाए जाने दे परते च अमरीकी फौज नै ईरान पर हमले कीते न। ईरान आसेया बी अमरीकी ठकाने पर मिसाइल ते ड्रोन हमले दी खबर।
5. ऋतुराज गायकवाड दी शानदार सेंचरी ते तिलक वर्मा कुशल कप्तानी दी बदोलत भारत "ए" ने मजूदा त्रिकोनी श्रृंखला दे पैहले मैच च श्रीलंका गी 8 रन्ज कन्ने रहाँ दिता।

<><><><><><>

PM Longest Serving

प्रधानमंत्री नरेन्द्र मोदी होर अज्ज भारत दे सब्बनं थमां लम्बे समें तक्कर सेवा करने आहले निर्वाचत प्रधानमंत्री बनी गे न। श्री मोदी होरें 26 मई 2014 गी प्रधानमंत्री पद दी शपथ लैती ही। उनें पंजित जवाहर लाल नेहरु हुंदा रिकार्ड त्रोड़ी दिता ऐ। जिनें पैहली बारी 13 मई 1952 गी निर्वाचत प्रधानमंत्री दे रुपें च शपथ लैती ही ते 27 मई 1964 तक ओ प्रधानमंत्री दे ओहदे उप्पर रह। पंडित जवाहर लाल नेहरु हुंदा प्रधानमंत्री दे रुपें च कार्यकाल 4 जहार 398 दिनें दा रेहा- जिसले के 26 मई 2014 थमां अज्ज 10 जून 2026 तक्कर- प्रधानमंत्री नरेन्द्र मोदी हुंदा कार्यकाल अजें तक्कर 4 जहार 399 दिनें दा होई गोआ ऐ- जेहदे कन्नै ओ भारत दे इतिहास च सब्बनं थमां लम्बे समें तक्कर सेवा करने आहलें निर्वाचत प्रधानमंत्री बनी गे न।



World Leaders Congratulations

दुनिया दे कैई नेताएं प्रधानमंत्री मोदी होरें गी भारत दे सब्बनं शा लम्मे अरसे- चुने गेदे प्रधानमंत्री- बने रोहने पर ममारकबाद दिती ऐ। इनें नेताएं प्रधानमंत्री हुंदे मजबूत शासन- दूरै दी सोच रखने आहले नजरिएं- मुख्यै गी विकासशील थमां विकसित राष्ट्र बनाने दे लक्ष गी लेइयें कीती गेदियें कोशशें ते समावेशी ते आर्थिक रुप कन्नै भारत गी मजबूत बनाने दे उन्दे जतनें दी सिफ्त कीती। श्रीलंका दे राष्ट्रपति अनुरा कुमार दिसानायके होरें आखेआ कि एह उपलब्धि दुनिया दे सब्बनं शा बड्डे लोकतंत्र दी जनता आसेआ उन्दे पर बार-बार जताए गेदे भरोसे दा सबूत ऐ। पापुआ न्यू गिनी दे प्रधानमंत्री जेम्स मारापे होरें इक वीडियो सनेह च प्रधानमंत्री होरें गी इक आदर्श नेतृत्व

दी मसाल करार दिता ते दौनें मुख्ये दे सरबंधे गी होर निगगर बनाने दी इच्छेया जताई। त्रिनिदाद ते टोबैगो दी प्रधानमंत्री कमल पर्सद बिसेसर होरें अपने ममारकी सनेए च आखेआ कि मोदी हुंदे नेतृत्व च भारत कुल संसारी मुद्दें गी लेइयें इक मजबूत आवाज बना करदा ऐ।

<><><><><><>

NDA Meeting

राष्ट्रीय जनतांत्रिक गठबंधन NDA दी अज्ज नमीं दिल्ली च इक बैठक लग्गा रदी ऐ- जेहदे च सरकार दे 12 बरे पूरे होने ते प्रधानमंत्री नरेन्द्र मोदी हुंदे सब्भनें शा लम्मे अरसे तगर लगातर- चुने गेदे प्रधानमंत्री बने दे रौहने दी खुशी बी मनाई जाहग। बी.जे.पी दे बड़डे नेताएं दे कन्नो-कन्नी NDA गबंधन दिएं सब्भनें भ्याल पार्टियें दे नेताएं गी बी इस बैठक च शामिल होने लेई सद्देया गेदा ऐ। बैठक च NDA दे शासन आहले सब्भनें 22 राज्यें ते केन्द्र शासत प्रदेशें दे मुखमंत्री- उपमुखमंत्री ते NDA दे भ्याल नेता मजूद रौहगंन। बैठक च बक्ख-बक्ख विकास कार्जक्रमें, बुनियादी सुविधाएं कन्नें जुड़े दे कार्जक्रमें ते सरकार दे विकसित भारत 2047 आहले लक्ष्य पर चर्चा होग।

<><><><><><>

Amit Shah -Ninimay

केन्द्री गृह मंत्री अमित शाह होरें कल नमीं दिल्ली च जिमी बंदरगाह प्रबंधन प्रणाली LPMS विनिमय दा उदघाटन कीता। एह भारत दी जिमी दिएं सीमाएं पर माल सम्यान ते यात्रिएं दी आओ-जाई सरबंधि प्रक्रिया गी डिजीटल ते बवस्थित बनाने दी दिशा च

इक महत्वपूर्ण गेंऽ ऐ। इस मौके शाह होरें आखेआ कि एह पैहल आधुनिक ते
टैक्नॉलोजी पर आधारित सीमा प्रबंधन प्रणाली तयार करने भेठा सरकार दे पक्के धेड़ए
गी दर्शादी ऐ। उनें आखेआ कि एह मंच विकसित भारत-2047 आहले लक्ष दे भलेया
मताबक ऐ ते एह बपार-कारोबार च सखाल- सम्पर्क ते राष्ट्रीय सुरक्षा गी बी मजबूती
देग। उनें आखेआ कि LPMS प्रणाली गी आधुनिक डिजीटल एकीकृत ते रिअल टाइम
प्रबंधन मंच दे रुपै च डिजाइन कीता गेदा ऐ।

<><><><><><>

VB-G RAM G

ग्रामीण विकास लेई केन्द्र सरकार नै सवा लक्ख करोड़ रुपे दी महत्वपूर्ण योजनाएं दी
घोषणा कीती ऐ। केन्द्री ग्रामीण विकास मंत्री शिवराज सिंह चौहान होरें दस्सेआ ऐ कि
केन्द्र सरकार मनरेगा दे तैहत पैहले गै 30 जहार करोड़ रुपे जारी करी चुकी दी ऐ ते
एहदे इलावा राज्यें ते केन्द्र शासित प्रदेशें गी 95 जहार 692 करोड़ रुपे दी बाद्दू रकम
अंतरिम रुपै च जारी कीती गई ऐ। चौहान होरें विकसित भारत ग्रामीण विकास दी
अमलावरी दे सरबंध्यै च बक्ख-बक्ख राज्यें दे ग्रामीण विकास मंत्रिणं कन्नै इक वर्चुअल
बैठक गी सम्बोधित करने मगरा मीडिया कन्नै गल्ल करदे होई आक्खेया- विकसित
भारत G.Ram.G अधिनियम पूरे मुख्यै च पैहली जुलाई थमां लागू होई जाहग। मंत्री
होरें दस्सेआ जे 26 राज्यें बजट प्रावधान करी दिते देन ते मिजोरम-तेलंगाना- कर्नाटक
ते झारखंड नै बी प्रक्रिया तौले रम्भने दा भरोसा दोआया ऐ।

<><><><><><>

EAM Visit

विदेश मंत्री डाक्टर एस. जयशंकर अज्ज थमां दो-दिन दे आधिकारिक दौरे लेई बुल्गारियां ते फिनलैंड जा रदे न। विदेश मंत्रालय ने दस्सेआ ऐ जे Bulgaria यात्रा दे दुरान डाक्टर एस.जयशंकर होर Bulgaria दे शीर्ष नेताएं ते Bulgaria दे विदेश मंत्री हुंदे कन्नै मलाटी करगन। इस यात्रा दे दुए चरण च फिनलैंड च डाक्टर जयशंकर 14मीं कुलतारंता वार्ता च हिस्सा लैगन। इस वार्ता दा विशे ऐ- “A World in Transition: Global, Regional & Local Perspectives” यानि “परिवर्तनशील दुनिया: वैश्विक, क्षेत्रिय ते स्थानीय परिप्रेक्ष्य”। डाक्टर जयशंकर होर फिलैंड दे विदेशमंत्री ते होर नेताएं कन्नै बी मुलाकात करगन।



Trump Helicopter

ओमान दे समुन्द्री कंडे कश अमरीकी फौज दे अपाचे हेलीकाप्टर गी नशाना बनाए जाने दे परते च अमरीकी फौज नै ईरान पर हमले कीते न। अमरीकी अधिकारिण दस्सेआ ऐ कि हेलीकाप्टर गी इक ईरानी ड्रोन नै नशाना बनाइयै हेठ सुट्टी दिता हा-पर दौनें पायलटें गी बचाई लैता गेआ हा। अमरीकी हमले दे बाद ईरान दे शैहरें सिरिक- मीनाब- बदर अब्बास ते केशम टापु पर धमाकें दियें वाजां सनोचियां। एह इलाके होर्मुज जल उमरु कन्नै सटे देन। राष्ट्रपति डोनाल्ड ट्रम्प होरें आखेआ कि ईरान आसेया अमरीकी हेलीकाप्टर ढाए जाने पर अमरीका दी प्रतिक्रिया निग्गर ते ताकतवर ऐ। ईरान ने बी इलाके च अमरीकी ठाकने पर मिसाइलें ते ड्रोन कन्नै हमले कीते न। ईरानी विदेश मंत्री अब्बास अराघची होरें आखेआ ऐ अमरीका दे कुसै बी हमले दा पूरी

तगड़ेआई कन्नै परता दिता जाहग। ईरानी विदेशमंत्री होरें फौजें गी होर्मुज जल डमरु छोड़ने जां उपरोतली खतरे च रोहने दी चेतावनी दिती ऐ।

<><><><><><>

Men's Cricket

ऋतुराज गायकवाड़ दा शानदारी सेंचरी ते तिलक वर्मा दी कुशल कप्तानी दी बदोलत भारत “ए” ने मजूदा त्रिकोणी श्रृंखला दे पैहले मैच च श्रीलंका गी 8 रन्ज कन्नै हराया।

एह मैच श्रीलंका दे Rangiri Dambulla International Stadium च खेड़िया गेआ। पैहले बल्लेबाजी करदे होई भारत नै 6 विकेटें दे नक्सान पर 50 Overs च 277 रन्ज बनाए- जेहदे परते च श्रीलंका दी टीम 269 रन्ज गै बनाई सकी। ऋतुराज ने 114 गेंदे च 101 रन्ज दी शानदार पारी खेड़ि जेहदे च 6 चौके ते 3 छक्के शामिल हे। शुरु च भारती टीम 16 रन्ज पर 2 विकेटां मोहाड़यै इक चाल्ली नै संघर्ष करा करदी ही पर- कप्तान तिलक वर्मा दे 60 रन्ज ते ऋतुराज कन्नै मिलियै 150 रन्ज दी सांझेदारी नै पासा पलटी दिता।

<><><><><><>

Siraj Replaced

Ireland ते इंग्लैंड कन्नै होने आहली टी-20 इंटरनैशनल सीरिज़ च इंडिया टीम Squad थमां तेज गेंदबाज Mohd. Siraj गी बाहर रक्खेआ गेआ ऐ। सलैक्शन कमेटी नै Mohd. Siraj दे थाहर पर Prasidh Krishan गी इस टी-20 इंटरनैशनल सीरिज़ च रक्खेआ ऐ।

<><><><><><>

IMD Weather

भारती मौसम मैहकमे ने अज्ज दिल्ली/ हरियाणा/ चंडीगढ़/ पंजाब/ हिमाचल प्रदेश/ जम्मू-कश्मीर/ लद्दाख/ उत्तर प्रदेश ते पच्छिम राजस्थान च गर्म लूह चलने दी पेशनगोई कीती ऐ। कोंकण ते गोवा ते ओडिशा च दिने गर्म ते उमस आहला मौसम रौहने दी मेद बुज्जी ऐ। उ'आं अरुणाचल प्रदेश/ असम/ मेघालय/ तटीय कर्नाटक/ उप हिमालमन पच्छिम बंगाल ते सिक्किम च भारी बरखा होने दी मेद ऐ। अगले 2-3 दिनें दरान बिहार/ कर्नाटक/ केरल/ माहे/ कोंकण/ गोवा/ तमिनाडू/ पुद्दुचेरी/ कराईकल/ तेलंगाना ते उत्तर पूर्ण भारत दे किश हिस्सें च बी बरखा होने दी संभावना ऐ।

<><><><><><>